



徐公文集卷第三十

東海徐鉉

故唐慧悟大禪師墓誌銘

故唐衛尉卿保定郡公徐公墓誌銘

故唐水部郎中崔公墓誌銘

故汝南縣太君周公夫人墓誌銘

大宋故亳州蒙城縣令曾君墓誌銘

故唐內客省使知忠義軍尚公羨道銘

故鄉貢進士劉君墓誌銘



後集卷三
故唐慧悟大禪師墓誌銘并序

士有佩服聖道闡揚師訓進不累於軒冕退不滯於丘樊務勤身於濟衆不養高以絕俗其唯仁人矣大禪師名沖煦字大明姓和氏昔者帝堯先宅天下我祖世掌天官保姓受氏冠冕百代在漢則調鼎之重在晉則專車之賢末葉湮沈徙居固始先君從郡豪王氏南據閩方今為晉安人也大禪師生稟異氣幼挺玄機年十有五詣鼓山興聖國師出家即具戒品博覽經史雅好文詞郡多俊秀咸見推仰證無為之

理演不言之教綽為先達端然妙門居城北之昇山于時王氏衰淪亂臣專恣淫刑飛語虐及善人大禪師杖策去之適臨川郡中書令宋公齊丘作鎮南楚頗尚空玄聞師之來遠加延納言意不合拂衣而行下至池陽郡守王公繼勳鄉國之舊賓禮甚渥時季唐二葉像教方興嗣君聞其名召與之語移晷而罷眷矚殊優命居光睦禪院後遷長慶道場俾與儲貳游處實羽翼也後主即位恩旨加隆特賜法智禪師之號廬山開先禪院者嗣君所創真容在焉命大禪

師居之精嚴修奉之儀以申罔極之感居數年召還
建康止報恩禪院加號慧悟大禪師名其所化曰智
度堂精廬柳比選勝而處禮秩之數有踰於前出則
居奉先道場入則居淨德內寺開寶七載夏六月寢
疾旬餘乃——大眾與論生死之理十九日清旦上
疏告辭後主遣使問之至則化矣享年五十有九住
法四十四年即其月二十五日從西域之禮收靈骨
葬于鐘山之陽禮物官給中使監護至某年月日弟
子省才遷于廬山某所遵理命也大禪師風骨秀整

機神穎悟博該象藝綜以玄談王公大人咸所欽尚
鉉非學釋氏者不能言其道業徒以傾蓋之分久要
不忘今京師復與才公胥會才公以文藝精敏見重
於時永惟嚴師之義願刊不朽之迹嘉其偉志為作
斯銘銘曰

慧悟禪師釋雄之奇有文飾己有道膺時生延世寵
沒有遺思歸舟翩翩九江之湄鑪峰勝境蓮社餘基
門人稟訓遷神于茲哀翁懷舊勒銘誌之蘭菊無絕
高深與期

後漢書卷三十一
三
故唐衛尉卿保定郡公徐公墓誌銘

公諱迪字昭用東海人也仁義之胄繁衍萬邦別族於太史者十家因封而占籍者四郡而有郟之邑鉅人寔多著於簡編可以揚推唐室云季天下崩離江淮之間獨為漢守惟我大父首從義兵受遺戡難同伊尹之相太甲字孤立後如有虞之保少康故得勳銘鼎鐘世享茅土連姻合族與國存亡考諱知詢為江西節度使公生於郡解方孩而孤四歲免喪即加五品之服幼學就傳遂疏百里之封立朝侍祠恩禮

優渥自太子中允累遷至衛尉卿天姿嚴肅常持謙下之禮世祿隆盛每存恭儉之規不讀非聖人之書自為保家之主思不出位時無間言始終一心出入三紀嗚呼星迴日薄棟折榱崩命有所懸義無苟免享年四十有六開寶八年冬十有一月二十有八日沒於難明年春三月權窆于大塋之側至某年月始備大葬之禮卜祔焉夫人王氏張氏劉氏皆早世並南朝之名族享小君之命數壺儀婦順彤史存焉子太素太初太沖等皆修令名不墜前訓故能以淪昏

之後具飾終之禮奉先之孝時以為難宗人永懷是
有紀述辭曰

於惟我宗昭時顯庸積德垂範爰生我公出孝入悌
夷心直躬生能業官沒不忘忠是有慶靈鐘於令子
不墜其訓葬之以禮謀卜謀筮維桑維梓神道永謚
流光不已來者難誣斯文用紀

故唐朝散大夫尚書水部郎中崔君墓誌

銘并序

公諱致堯字用之其先清河人也周室大風肇洪源

於公望漢庭明月抗忠節于季珪德厚流光謀孫翼
子冠蓋之盛莫之與京我高祖翼亮有唐四至丞相
曾祖彝不仕祖得吏部員外郎考億建州建陽令值
天下亂因而家焉今為建安人也君少而不羈長而
好學介然如石非禮不行鄉曲之名籍甚於世季唐
嗣業博采時才君以御族之秀獻書求試補江州彭
澤滁州清流二主簿改建州浦城軍判官所至有聲
應用不暇再為建州將樂令其地巖險其民獷悍寇
攘亡匿率以為常君厲以嚴明信其刑賞汙俗咸革

比尸安居遂獲貞幹之稱又遷紀綱之任改常州錄
事叅軍連考善最擢拜殿中丞遷虞部員外郎郡國
之政多使素治忘身狗節綽有能名無何都下受兵
羣師入援以君為水部郎中實掌軍饋既而時運告
謝宗社淪胥諸侯之師莫不卷甲君與其部將南趣
建安中塗象潰遂沒於難春秋若干嗚呼興亡之數
聖賢安能免忠義之節顛沛必於是不然何以見伯
夷首陽之風王蠋布衣之操也夫人吳氏克有婦德
能緝素風藐是流離不墜門閥子憲寔定等皆稟庭

訓咸修詞業憲在舊國以進士擢第八朝為潁州沈
丘尉復從州里之舉 皇上臨軒親試又擢高科為
隨州觀察推官所謂善人必有餘慶某年月日憲等
始備大葬之禮號奉靈柩寔于某州縣鄉里之原禮
也鉉素熟君行學因銘墓焉銘曰

嗚呼崔君百世清芬忘身狗國斯為貞臣種德垂訓
斯為慶門芄芃故園我我高墳沒而不朽用勒斯文

故汝南縣太君周氏夫人墓誌銘并序

夫人諱某字某廬江舒人三國時吳將公瑾之後公

徐公集卷三
瑾葬于舒之宿松今裔孫奉祀者百餘家雖降在畎
畝而時生間傑烈考諱本幼而遇亂自奮從軍吳王
創基功冠諸將季唐建業位列宗臣官至中書令封
西平王夫人即王之弟某女也天姿玉瑩淑性川渟
孝德內融柔儀外映既笄歸于徐氏府君諱某即唐
相司徒公玠之弟某子也于時江左方盛二族齊榮
婚姻之貴雄視王謝而夫人雅性謙謹率由禮經至
於蘋藻之嚴佩環之節澣濯之儉織紵之勤必以身
先罔弗由道宗族親睦人無間言府君仕為閭門副

使殿中少監早卒四子皆幼夫人提攜教訓親授經
書及其出就外傳已通孝經論語矣性曉音律而尚
雅聲善絲竹而精琴瑟習孝經而宗玄言齋居諷誦
未嘗懈怠雖閨門之內常以慈撫而家人之節有若
嚴君故其門風肅然先業不隕豈非天和充已而道
氣感物者歟春秋四十八開寶九年正月二十一日
終于建康瑞里官舍其年二月葬于江寧縣鳳臺鄉
婁侯里長子某亦為諸司副使及入朝為京兆府醴
泉令陝州錄事參軍公府交薦遂升閨籍太子右贊

善大夫夫人始以子貴授汝南縣太君至是朝命復
追榮焉次子繼宏舉進士次繼宇次繼宗初夫人之
亡會宗國淪覆寔安之事不暇如儀至太平興國某
年月日繼宗等始改寔于某所附大塋焉禮也鉉與
西平諸子辱為交遊及相府宗黨復敦事舊故得以
門內之理為隧道之銘傳于無窮斯為實錄銘曰
侯藩之子相門之嬪道高萊婦德邵陶親猗歟彤管
永世芳塵生榮沒哀何必眉壽粉田啓邑斯為不朽
令子承家斯為有後孤卻降替二族依然陵谷遷賢

松楸附焉謂天蓋高福善胡愆勒銘泉戶蘭菊綿綿
大宋故是州蒙城縣令賜緋魚袋魯君墓

誌銘

君諱文照字知章其先魯人百行之先垂為家法子
孫蕃衍不隕其聲末葉因官徙居南楚今為廬陵新
淦人也祖朴考福皆不仕君生稟異氣卓然老成六
經之旨有若夙習于時江表之地唐室猶興憲章文
物不失舊典君年七歲應州里之舉以神童擢第選
滿補江州東流尉遷靖安句容二尉皆以清白敏惠

承上率下和而有正能不自矜連考殊尤擢為吉州
太和令桑梓之地瓜李多嫌君閨門之行素脩童父
之情已信而復臨事能斷盡公無私由是暮年政成
就賜朱紱會宗國淪覆舉族入朝授亳州永城令舟
車輻湊之地郵傳旁午之塗盤根錯節發劓靡滯事
無愆素民不告勞上疏論以一邑之象供列郡之賦
指引利害較然可分詔特許免其縣挽船夫歲省萬
計改蒙城令其理益精頃之河南大蝗獨不入蒙城
之境於是吏民相率詣闕借留優詔褒美許留三載

會王師北討君督本縣運輸深入虜庭危而後濟既
還遇疾以雍熙三年四月日終于永城傳舍享年若
干初君之赴選也余遇之於建康察言觀行知為良
士因以表甥女姜氏妻之有子六人女八人君之從
士世塗多故王事靡盬不遑顧私雅志未申中路早
世唯第三子乾度再舉進士名聞場中有後之慶當
在於此即以某年月號奉靈柩歸葬于某鄉里祔大
塋焉禮也嗚呼姻舊之故豈無佗人援毫濡涕識彼
陵谷其銘曰

有患於民死事以勤嗚呼曾君永世清芬仙山之陰
章江之濱考終歸全下從先人刻茲琬琰垂示後昆
故唐內客省使知忠義軍檢校太傅尚公

羨道銘

公諱全恭字子初其先清河人也粵若天監代商文
王受命涓濱卜獵尚父膺期實始華宗誕彰餘慶在
漢則丘園之盛德在唐則藩屏之名臣蕃衍孫謀著
之家謀祖慈潤州館驛巡官因家焉考公廼為昇州
牙將為郡守馮鐸使于淮甸與吳武王議疆事抗詞

奮勵誓不辱命明年而馮氏兵敗悉象歸于廣陵吳
王得之甚喜曰汝為馮公詬我真義士也今事我無
易爾心即以右職處之賜與甚厚由是感激知己竟
死事于鄱陽以故三子皆獲叙錄累贈右千牛將軍
公即第三子質性端慤容貌矜嚴吉人寡詞非禮不
動季唐有國公仕為客省丞旨先主器之特加任使
凡所授職皆與先達長者侔勤以繼之所至皆理累
遷至館驛副使嗣君即位轉閣門副使遷客省引進
使凡時務制獄多命公與焉循理持平甚獲時譽宣

布詔命出納必信監護師旅威惠得中不從諛以取
容不矯激以忤旨故考績無玷而主恩益深累遷內
客省使後主即位兼領閭門使遙領婺州刺史初國
之戈船皆屯于石頭城之後盧龍鎮下命曰龍安軍
旅之重任也於是復兼龍安軍使明年改潤州監軍
使權領州事善於為政大治民謠逾歲徵還遙領饒
州觀察使兼左龍衛神武護軍公固辭兵柄閩嶺之
地巖險遼遠鎮守之寄常以為難又命公知忠義軍
兼建州事泣政三載建人安之會都下受兵羽檄相

望公調發軍實應接舟師奔命之象道路相望猶以
不獲身先憂憤成疾朝廷方命公為節度觀察等使
留後檢校太尉使者未至甲戌歲冬十一月二十五
日卒于公著享年七十以十二月二十三日葬于建
安縣某鄉某里前夫人蘇氏繼室安樂縣君孫氏皆
早卒子三人審元審庸審能公以忠烈之風處親近
之職守以周固齊以法度身貴而志遜祿厚而持廉
凡同列者使于諸侯率多貪求浸以成俗公獨淡然
無取出入垂橐士君子以此重之及邦國淪胥豪右

徐集卷三
降替向之聚斂者翦焉無餘唯公令嗣克家門族如
故識者知有天道矣鉉少參近密與公常接笑言道
義相期有若寮舊聲塵永已慷慨長悲惜其風猷思
其論謨昔裴子野之卒湘東王為誌矣而邵陵王又
銘於羨道羨道有銘自此始也故仰前躅追而銘云
表海之慶世載厥聲辰矣君子心純道貞恭職軒陛
申威禁營將命四方宣風百城哀哉不淑永矣忠誠
舊國永忝交情死生濡毫頌美愴愴霑纓

故鄉貢進士劉君墓誌銘

君諱鶚字仲翔其先彭城人也炎靈之裔繁衍萬邦
占籍廬陵蓋重世矣高祖浟祖珍皆不仕父雄嘗從
九江辟司兵掾自免去職閨門之教不肅而成有三
子君其仲也質性純素智識聰敏年十有五則知屬
文未及弱冠馳名矣至於事親孝事長悌與朋友信
接鄉黨諱動不違禮居常慎獨故州里者盡與時之
名輩推重焉郡舉茂才擢升上第明年而宗國淪覆
君慨然知時人不利也於是閉門却掃為學益勤以
為今之文人率以詞賦取高先王之教化蓋蔑如也

乃按天下之務論古今變著法語八十一篇大抵宗尚周孔以質百氏之感視其書知其人矣皇宋二聖宗古尚文郡國考秀親臨考覆君以詞場舊望復為本郡升聞余與翰林學士賈公承詔先考第于南宮賈公重君之文以為古人之俊也乃第為高等而君狗難進易退之節稟外敏內愚之容及其敬庭復不中選退還鄉里篤行如初雍熙三年九月卒于家享年四十有三嗚呼有才有時命不我與自古同歎可勝道哉遺文累哀不朽之謂也即某年月葬于本縣

化龍鄉折桂里之原禮也君娶郭氏先十日而亡子師望文綺皆得父風其有後矣二女長適太原郭方次適隴西李其師望以余為父之知己也故千里號訴求誌其墓云詞曰

嗚呼劉生江楚之英才識魚茂時命難并沒于白屋
閱此泉扃立言可法何必浮榮刻茲貞石永爾高名

徐公文集卷第三十

宋故金紫光祿大夫左散騎常侍上柱國東海縣開
國伯食邑七百戶責授靜難軍節度行軍司馬徐公
季七十六行狀

公諱鉉字鼎臣其先東海邳人也周德之衰僣王以
仁義所歸者七十餘國乃遜于江淮之南會稽太末
里有廟存焉積慶所鍾令嗣蕃衍故自烈考已上皆
生于會稽公所譔改卜合葬烈考太夫人於洪州西
山墓誌詳矣公與弟錯屬烈考即世季皆幼稚太夫
撫育教導資以生而知之咸以雄文奧學克振令譽

公未弱冠以廕釋褐為校書郎直宣徽北院機命文
翰寔專司之以名御密稱先主即位以本官直門下省
賜緋試知制誥辭達典雅智効勤恪嗣主初拜祠部
員外郎知制誥後親受命草詔者無所經據不根事
實繇是駁議忤旨左遷泰州幕職途中詩云浮名浮
利信悠悠四海干戈痛主憂三諫不從為逐客一身
無累似虛舟滿朝權貴皆曾忤遠郭林泉已遍遊唯
有戀恩心不改半程猶自望城樓謫居三年嗣主知
其無罪徵復本官仍知制誥公餘力攻篆書度越陽

冰而與李斯為等夷著質論十四篇極刑政之要盡
君臣之際並傳於世斯為不朽矣文章論議與故贈
揆相韓公同志齊名時人謂之韓徐及江淮之平建
州也而福州與越人拒命不服使陳覺馮延魯招撫
之未報遂擅興兵攻取時軍師不一聽而無上又出
不以律象敗績而退乃歸罪二使將誅之時陳覺之
使國老宋公之所舉也於是上表待罪蓋欲救解之
遂械二使以歸聽命公與韓公議救此二人則萬姓
謗讟之怨歸于上二使首領之患在於齊丘辱國容

徐公行狀
一
奸斯為巨蠹遂同上書極言其罪追正刑書克協象
心式沮狂計嗣主親批荅疏略曰昨陳覺之行實太
傳舉之矣及師敗之後事下有司太傅無救拔之詞
有自訟之表以是之故得不再思何者先朝舊臣國
家元老不唯舉人偶失可得興言直是謀之不臧亦
未有加罪之理昔魏武帝乘降劉琮之勢將兼并吳
國張昭時居朝右為吳老臣一旦勸請其君臣妾於
魏此謀不以為拙曷以為拙乎賴周瑜輩力爭而止
之及魏師之敗昭亦晏然自處吳大帝亦不之見責

彼二子孤若懷憤排之意戮之久矣此際長流遠郡
斥為庶人五木被身一家狼籍永從流放與死何殊
卿等憂國情深除奸意切諸所徵引批荅未殫公與
韓公同表謝略曰伏讀批荅曰卿等憂國情深除奸
意切是陛下知其奸也又曰永從流放與死何殊知
陛下必不用也既知而棄雖在何為公事君匪躬嫉
惡好直危言危行始終不變率此類焉尋徵拜中書
舍人公嘗誘掖後進苟有一善必延譽之潔已請益
者亦誨導之不懈壬子歲翰林學士江公知貢舉始

以進士王克貞等三人及第盡復舉場之故事獨由
公左右贊成之江公即長興三年盧華下及第嗣主
因問北朝取人何如御此來江公對以北朝公薦私
囑相半若此來唯以公道選材實無有此事嗣主甚
善之中書舍人張緯聞之以為皆大朝及第不本江
公之意甚銜之時宰執皆非名第同力欲罷此科遂
下制輟應舉焉明季公兼判文理院遂首言此事絕
復不可遽止乃以進士張仲尼鳳賦朱觀老子
猶龍賦郭賁無聲樂賦印葵石城虎踞賦寫之以進

遂下制云去歲所司上言暫罷貢舉本難久廢况以
經季其諸色舉人並宜依舊解送自此不復廢矣公
之為文長於典雅直而不迂以理勝為貴其武成王
廟碑序末云微臣學愧常師用慙兼備承明再入故
無經國之材宣室微還幸對受釐之問將使延州聽
樂長聞雅正之聲圮上受書世出帝王之佐蔣莊武
帝廟碑序末云微臣潤色無功討論奚取思問神於
先聖姑欲事君苟獲罪於玄穹曷容媚竈唯於舊史
想見英風適當罷役之初爰奉屬辭之詔西州作頌

徐行狀
誠慙邑子見稱南國刊銘或望至尊所改又銘末云
謝傳長逝王公不作獨我莊武先迂睿略斯皆披文
相質立言邁俗豈惟情見乎詞而已矣時江南久興
建屯田楚州常州尤甚聚斂招充之輩侵奪射利民
不聊生言事者累諫不聽洎國老宋公上疏主者堅
執不易於是命公往察訪一如親行可興可廢悉以
便宜從事後奏公既行而羣黨已切齒矣楚州應非
理遷入屯田之產業盡還本戶百姓謹誦感泣如釋
墜犴次至常州亦如楚州處置協比象惡之徒鑿以

檀作威福徵還私第待罪蒼蠅貝錦膠固組織詰難
問狀不容自理鍛鍊深刻將置大辟其貶制乃張緯
所草末云尚以季齡方壯文學甚優特屈彞章宜從
流放於是長流舒州時弟錯任右拾遺集賢殿直學
士亦貶祕書郎分司東都公前左遷泰州弟亦貶烏
江尉及流舒州親友臨江相送韓相有詩云昔季棲
浙此江湄風滿征帆淚滿衣今日重憐鷓鴣羽不堪
波上又分飛在同城三季唯游覽勝境披翫典籍尤
工吟詠情性未嘗以得喪蔓芥于方寸謨周將軍廟

碑銘文宣王廟碑序爲公亭記九疊松讚皆足志之
文刻于貞石及疊移饒州未登途而周世宗之師過
淮取舒蘄公遽携家榜小舟由皖口歸昇州公賦詩
末云一夜黃星照官渡本初何面見田豐其情發於
中不顧言之太直如此明季授太子左諭德未幾復
知制誥拜中書舍人通署中書省事時周世宗弭兵
修好待嗣君以優禮異數凡章表往復討論潤色多
公所為及世宗崩祭文寔公視草嗣主嘉賞時人傳
寫為之紙貴侍嗣主殂于豫章護喪歸建業後主即

位官職如故而訪聞詢謀無改嗣主之道其知舉也
不獨考其文章必先察其德行故難於得人出羣拔
萃者最稱吳淑復以子妻之其所問策五道盡時務
政之要後主並親答焉仍俾詞臣悉對之後主以尚
書省綱條弛紊官司怠棄積習已久思公止之人以
糾劾提振之徒公為尚書左丞逾月而罷以尚書右
僕射游公判六司拜公為工部侍郎知制誥翰林學
士尋以憲署曠職法吏侮文非委直清不能嚴肅拜
公御史大夫而佞用諛勝吾道不行於是奉身而退

徐公行狀
拜兵部尚書知制誥翰林學士以先奉命脩嗣主實
錄乃專以屬辭比事為務後主每有著述必令公先
弟視草而後編錄故雜說公為之序文集弟集賢舍
人為之序彼昔之二龍兩驥烏足以方茲令名焉王
師之弔伐金陵也公急病謫夷請使於天朝以釋後
主之前事辯疑分謗且服罪降名以鄙入為請庶不
隕奕世之國祀已行遂拜右僕射同參左右內史事
及親

太祖敷奏忠懇執議誠信雖不得請

太祖亦甚嘉歎美其秉節無撓既復命自以不能副
後主之望雪泣固讓不受其新命焉尋從後主歸朝
授太子率更令

皇上登極素知公之文學優瞻久司教令特授直翰
林學士院拜給事中侍從

鑿輿下并汾襄偽之地巡狩魏博逐入寇之虜申威
耀德因壘懷來告至策勳詔示填委雖翰林諸公盡
熙帝之載而公亦豫有力焉數年拜右散騎常侍慶
恩升左散騎常侍未季公著靜齋自箴篆書刊石寘

于座右曰爰有愚叟栖此陋室風雨可蔽戶庭不出
知足為富娛老以逸貂冠蟬冕虎皮羊質處之勿疑
永終爾吉後之君子觀之有以見公名重益謙德成
藏密與其一無所鑿而窺冀所不休者是天之戮民
不可同季而語矣惟公未冠筮仕名稱籍甚日彰夙
習非聚學辯問之所克也稟心忠正治身儉約公家
之事知無不為自幼至老惡其聚斂貪冒未嘗微實
于懷俸祿所入不問多少隨時供億而已居處求安
不務顯敞但聊以蔽其風雨量家所受餘分貸親故

舊知寓止焉與人交有始有卒必誠必信久要不替
雖中或不善人無間然初與禮部尚書常夢錫給事
中蕭儼之為莫逆蓋以二公常忿宋國老狃于締繫
之業包藏凶慝每章言其罪公亦同力嫉惡先主嗣
主因審度為虞故不任之以政及宋國老暮年因陳
覺李劬古協謀不軌貫盈事發同時殛死嗣主追念
常蕭與公疇昔敢言果今日之速禍也時常公已卒
因言曰夢錫常欲殺齊丘恨其誅戮不見於是贈右
僕射焉適後主從容言及此事公且曰夢錫先卒不

見齊丘之敗嗣主已追贈矣唯臣與蕭儼之日覩朝
典况臣塵忝官列八座矣獨蕭儼之往為理官以赦
前失貶黜吉州以老告退願以臣今所居官授儼之
旌其先見後主由是召蕭儼之至建業以公所陳列
慰勞特授工部尚書以季過懸車致仕居吉州給奉
祿終身焉公於内外族視無疎密待之如一其有孤
嫠無告者皆糾合收養稱家之有無隨事拯濟婚嫁
視之如家人子雖說口謗議紛紛盈耳公自信不疑
唯恤孤念舊是急不知其它及左遷邠岐亦聖此獲

謹矣有子曰夷直朗州桃源令先公疾卒女三人長
適左贊善大夫高御名交次女適國子博士吳淑先公

卒次女幼有才淑未笄而卒公享年七十六某年月
日以疾終於邠州官舍恬然神氣不亂唯禁家人勿
哭以為怛化但囑以殯歸於洪州西山祔葬於烈考
太夫人之墓即以某年月日洪州胡某以舟至京護
載公之柩歸西山從理命也公業隆儒行奉五常而
不墮志嚮道風稟三寶而無玷故其立言蘊德久而
弥芳繕性觀妙老而益壯實古之人歟克播遺風允

資鴻筆謹狀

徐公行狀

徐公行狀

大宋故靜難軍節度行軍司馬檢校工部尚書東海
徐公墓誌銘

金紫光祿大夫尚書右僕射兼書侍郎平章事兼修國史柱國鄆國公李昉撰

上即位之元年冬以學士李昉獨直翰林詔太子率
更令徐鉉入院分直視草是時昉與公以同道相知
論交契之始也越四年春

天子率六師親征太原并壘既平遂北幸塞垣擢光
盧龍秋七月凱歌歸於京師軍衛之中書詔填委
公援筆馬上應答如流以扈蹕勞遷給事中直學士

院如故又四年授右散騎常侍始罷文翰之職端拱
元年帝親耕籍田改左散騎常侍積階至金紫光
祿大夫叙勲至上柱國累封至東海郡開國侯食邑
一千戶以淳化二年秋九月檢校工部尚書出為靜
難軍節度行軍司馬明年八月二十六日晨時起方
冠帶遽命筆硯語左右曰吾疾作矣手疏一幅約束
後事又別署一幅道者天地之母書訖而終年七十
六陝西道轉運副使鄭適來邠州遂出家財竭力襄
事即以其年十月奉遷靈柩還京師權厝於板橋

東南之佛舍受塔國子博士吳淑門生殿中丞杜鎬
時皆典治中秘書遂以公凶訃聞上覽表軫悼詔
出內府錢二十萬賜其家及明年七月洪州奉新縣
義門胡仲堯自豫章具舟楫迎公之喪葬于洪州新
建縣西山之鸞岡原奉遺命從先塋也公字鼎臣其
先曾藉人自言生於揚州曾祖諱源祖諱徽皆隱德
不仕父諱延休衛尉卿贈左僕射才高道真有名於
時公幼孤與弟錯皆苦節自立未弱冠以文行稱於
時仕江南李氏周旋三世歷校書郎直宣徽北院尋

直門下省三知制誥一遷司封郎中兩拜中書舍人
再入翰林為學士自貶官起為太子右諭德由尚書
左丞為兵部侍郎為御史大夫由大夫為吏部尚書
由尚書為右僕射同叅左右內史事堅讓不就王師
下金陵隨後主歸朝以太子率更令奉朝請今諫議
大夫張公似說公在江南時奉太夫人慈訓不妄游
下帷著書雖親族罕見其面年十六遇李氏先主霸
有南土辟命累至釋褐連任書府繇是經史百家爛
然於胸中矣其曲誥命也落筆灑翰應用無窮皆混

然而成有雅正之體當時名士如韓熙載者無敵尤
長於制誥公與之齊名其豫機密也居中守正無所
附會雖在家宴居如對君父其恭慎也如此當時用
事臣有陳覺魏岑者樂禍好權多撓時政公嫉之如
讎其掌貢舉也至公取人不受私謁先策問而後詞
賦進德行而黜浮華當時舉場號為得士公弟內使
舍人鐠每主文柄亦以直道自持故江表後進力學
未至者聞二徐為春官多望風引退其精鑒無私也
如此其持憲也當官執法無所屈撓姦邪為之側目

權貴因之斂手當時言風憲者惟公與故御史中丞江文蔚王師之渡江也公將本君之命使於朝廷且乞緩師以奉祭祀 太祖引見謂公曰汝主託疾不朝乖事天之禮况吾兵業已行無中輟之理歸報汝主善為之謀公因慷慨鋪陳自古成敗之道表明後主忠孝之節 太祖亦為之動容厚禮之遣歸初大軍已圍建業後主思命於交兵之間左右咸有難色公欣然請行後主欣然謂之曰爾既往即當止上江救兵勿令東下公曰是行非全策今城中所恃者救

兵奈何以臣此行止之後主曰比以和解為請復用決戰即是自相矛盾於爾得不危乎公曰今豈以一介之微而忘社稷之重但置臣於度外耳後主撫之泣下曰時危見節汝有之矣及歸朝

太祖盛怒責之曰吾向與汝言何謂弗達於汝主且拒抗之罪皆汝所為公頓首謝曰臣為江南大臣而其國滅亡抵此死有餘罪餘復何言

太祖于是歎息曰忠於所事者乎汝當事我如事李氏命坐存撫甚厚故相太子太師王公溥一見如舊

相識每有經史異義多質疑於公繇是琴樽蕭歌筆
硯酬唱無有虛日相得其歡故工部尚書李公穆有
清識嘗語人曰吾觀江表冠蓋若中立有道之士惟
徐公近之耳兵部侍郎王公祐負才尚氣未嘗輕許
人及見公常言於朝曰文質彬彬學問無窮惟徐公
耳公亦曰王公詞如江海心無城府真奇士也今吏
部侍郎李公至翰林學士承旨蘇公易簡皆當世英
俊奉公以師友之禮公仕朝廷將二十年前後錫賜
所得俸祿所入備伏臘外未嘗蓄聚一金所居之地

僅庇風雨惟古木數株每夏秋之際霖潦為患頽垣
壞宇人不堪其憂而公處之晏如也江南故人子弟
暨親族之孤遺者來投於公歲無虛月公分廩祿以
卹之虛館舍以安之殆於終年未有倦色有布衣荆
亮者老而多誕游公之門僅五十稔年九十猶矍鑠
不衰每從江南來詣公公置之道院日與之碁未嘗
語及佞事而待之如初公嘗言江南有處士朱貞白
嘗語人曰今人或言不欺神明也吾嘗佩服斯言不
敢為欺心之事有故人謝岳嘗為虢州盧氏令刺史

與之有隙凡選舉之制過七十即罷去遂奏謝年過不堪其任時江東初下仕人有可疑者咸質於公謝因私請曰某之齒公寔知之苟朝廷問公不敢望公言未七十但言不知其年即幸矣公曰君之甲子某且知之而云不知是欺天也苟或見問必以實對其至行無誑又如此公為文智思敏速或求其文不樂豫作令其臨事見白立為草之云速則意壯敏緩則體勢踈慢公愛婚吳淑言江南宰相馮延巳常語人曰凡人為文皆事奇語不爾則不足觀惟徐公不然

率意而成自造精極時人以為知言所著文多遺落今其存者編成三十卷又擬徐幹中論作質論數十篇集耳目聞見之異作稽神錄二十卷並行於世公文學之外長於篆隸其書札之妙自成一家當世士大夫有得其書者無不寶之以為楷法任常侍日奉詔與直史館句中正等重修許慎說文自撰韻譜一十卷學者服其精博公嘗慕老子清淨之教莊周齊物之理故內不能以得喪動外不能以榮辱干然而為學之心老而彌篤在邠州日以時俗文字偽謬乃

親以隸字寫說文字體纖細正如蠅頭過數萬言年
高目明洞見毫末其精力不怠如此夫人太原王氏
子朗州桃源令夷直並先公而卒長女適吳氏早亡
次女適左贊善大夫高慎交幼女十七娘才淑過人
未及笄年而夭自為誌文辭甚悽楚意孔門四科德
行文學洪範五福壽考康寧在於古人鮮有兼美惟
公高才懿行善始令終所謂登孔門之二科居洪範
之三福也語曰善人吾不得而見之矣惜哉銘曰
祖丘軻兮宗老莊奉三寶兮師五常生維楊兮仕建

康歸皇宋兮老大梁歿幽土兮葬豫章儒林文人兮
今也則亡嗚呼

祭文

維淳熙三年歲次壬辰十月辛酉朔十八日戊寅銀
青光祿大夫行尚書吏部侍郎兼秘書監上柱國李
至朝奉大夫左諫議大夫充史館修撰判館事上柱
國賜紫金魚袋楊徽之張洎等謹以清酌之奠致祭
于故左省騎常侍徐公之靈惟公博識宏才懿文
茂學如金之渾如玉之璞天然混成不加彫琢頃在

江左已聞素履及來 天庭孰不仰止周旋清顯殆
將二紀相如視草隰明近侍篆籀稱絕典謨得體其
馨如蘭其直如矢令問令望之才之美今也儒宗古
之君子五百年來一人而已道屈於位遇 休明之
世未盡伸才困於命當衰晚之年不得志嗟乎天地
之間人生如寄自古迄今其誰不死矧素髮之垂領
復何悲乎已矣可惜者淪於遠郡契濶千里鵬鳥之
賦未成二豎之災奄至淳于意子止一女鄧伯道兮
終無子此素友清交門生故吏可以失聲而長號汎

瀾而屑涕以為天道難忱善人如是至受教文字執
弟子之禮 微之泊有舊瀟湘敦故人之契迎旅櫬於
西郊風切切兮雨蕭蕭靈筵兮素幃動疑於蠶於寂
寥嗚呼臨喪一奠庶英魂之可招尚享

東海徐公挽歌詞

李 至

吾道亡宗匠明時喪大儒傳家無嗣子封岳有遺書
命劣長沙賈名齊鄴下徐不知千古後文行復誰如
執友韓夫子傳家弟楚金人稱聯壁重世慕二龍深
鮑謝須慙德機雲亦醉心可憐黃壤下埋沒此瑤琳

海內才名重儒中學問高病猶不釋卷老亦自揮毫
蠹簡披皆識亡書誦豈勞如能百身贖爭惜一鴻毛
說文修古篆質論著新詞尚父鷹揚頌周瑜水戰碑
家藏為世寶手寫作人師惜不歸宣室吾皇問受釐
薄暮郊郊遠何人不慘顏無兒見星往有妾護喪還
舊宅猶臨水空車却度關平生衣上淚今日為君斑

左散騎常侍東海徐公 此五君詠中之一

徐公真丈夫不獨文章伯江南兵未解主憂臣慘戚
公願紓其難苦求使上國庶獲一言伸少息苞茅責

其君驚且歎執手涕沾臆謂言知爾晚何此忠義激
天子叱在庭請讓雷霆赫公亦從容對曾不渝神色
仁者必有勇斯亦古遺直書大略其小我有春秋癖
所以此詩中不言公翰墨庶警事君心勉旃希令德

後序

徐公既沒門人等論次其文為三十卷叢秘閣吳正
儀今翰林潁川公並為之序論之詳矣都官負外郎
胡君克順通才博雅樂善好賢早遊騎省之門深蒙
鄉里之眷寶茲遺集積有歲時鏤板流行庶傳悠永

因以丞相趙郡文貞公鄧師隴西公所作墓誌挽詠
等於左次用垂茂實俾題于後以記厥由大中祥符
九年八月太常丞集賢校理晏 殊序

明州重刊徐騎省文集後序

騎省徐公文集三十卷天禧間尚書都官負外郎胡
君克順編錄刊行且奉表上進

章聖皇帝降詔獎諭叅知叅政陳公彭年為之序引
丞相晏元獻公復為後序騎省在江南有重名仕天
朝為近侍以文翰忠直在當時諸公先既歿丞相趙
郡李文正公實誌其墓所以稱述推尊之者甚至距
今且二百年其英名偉節得以不泯而為後學法者
繁文集是賴年世變遠兵火中厄鮮有存者偶得善

本使公庫鏤板以傳紹興十九年十一月十日右朝
議大夫充敷文閣待制知明州軍州事提舉學事賜
紫金魚袋徐 琛跋



